

四庫全書

史部

欽定四庫全書

元史卷一百六十三

明翰林學士亞中大夫知制誥兼修國史宋濂等修

列傳第五十

李德輝

李德輝字仲實通州潞縣人生五歲父且卒指德輝謂其家人曰吾為吏治獄不任苛刻人蒙吾力者衆天或報之是兒其大吾門乎及卒德輝號慟如成人適歲凶

家儲粟纔五升其母盎蓬稗炊藜藿而食之德輝天性
孝悌操履清慎既就外傳嗜讀書未於貧無以自資乃
輟業年十六監酒豐州祿食充足甘旨有餘則市筆札
錄書夜誦不休已乃厭糟麴歎曰志士顧安此耶仕不
足以匡君福民隱不足以悅親善身天地之間人壽幾
何惡可無聞同腐草木也乃謝絕所與游少年求先生
長者講學以卒其業時世祖在潛藩用劉東忠薦使侍
裕宗講讀乃與竇默等皆就辟癸丑憲宗封宗親割京

兆隸世祖潛藩擇廷臣能理財賦者俾調軍食立從宜
府以德輝與布都訥為使時汪德臣宿兵利州扼四川
衿喉以規進取數萬之師仰哺德輝乃募民入粟綿竹
散錢幣給鹽券為直陸挽興元水漕嘉陵未期年而軍
儲充羨取蜀之本基於此矣中統元年為燕京宣撫使
燕多劇賊造偽鈔結死黨殺人德輝悉捕誅之令行禁
止然事多不白中書由是忤平章王文統意去位三年
文統以反誅德輝遂起為山西宣慰使權勢之家籍民

為奴者咸按而免之復業近千人至元元年罷宣慰司授太原路總管時潛藩故傳相無有出為二千石者帝以太原難治故以德輝為守至郡崇學校表孝節勸耕桑立社倉一權度凡可以阜民者無不為之嘉禾瑞麥六出其境五年徵為右三部尚書人有訟財而失其兄子者德輝曰此叔殺之無疑遂竟其獄權貴人為請者甚眾德輝不應罪狀既明請者乃慚服七年帝以蝗旱為憂命德輝錄囚山西河東行至懷仁民有魏氏發得

木偶持告其妻挾左道為厭勝謀不利於已移數獄詞
皆具德輝察其寃知其有愛妾疑妾所為將構陷其妻
也召妾鞠之不移時而服遂杖其夫而論妾以死皇子
安西王鎮關中奏以德輝為輔遂改安西王相至則視
瀕涇營牧故地可得數千頃起廬舍疏溝澮假牛種田
具與貧民二千家屯田其中歲得粟麥芻藁萬計十二
年詔以王相撫蜀時重慶猶城守不下朝廷各置行樞
密院於東西川合兵萬人圍之德輝至成都兩府爭遣

使咨受兵食方略德輝戒之曰宋已亡矣重慶以彈丸之地不降何歸政以公輩利其剽殺民不得有子女懼而不來耳嚮日兵未嘗戰中使奉璽書來赦公輩既不能正言明告嚴備止攻以須其至反購得軍吏杖之偽為得罪使懼而叛去水陸之師雷鼓繼進是堅其不下也中使不諭詐計竟以不奉明詔復命如是者非玩寇而何況復軍政不一相訾紛紛朝夕敗矣豈能成功哉德輝出未至秦瀘州叛而重慶圍果潰再退守瀘州十

四年詔以德輝為西川行樞密院副使仍兼王相諸軍
既發德輝留成都給軍食是年復瀘州十五年再圍重
慶踰月拔之紹慶南平夔恩施播諸山壁水柵皆下而
東川樞府猶故將也懲前與西川相觀望致敗惡相屬
願獨軍圍合州德輝乃出合俘繫順慶獄者縱之使歸
語州將張珣以天子威德遠著宋室既亡三宮皆北我
朝含弘錄功忘過能早自歸必取將相與夏吕比又為
書以禮義禍福反復譬解之以為汝之為臣不親於宋

之子孫合之為州不大於宋之天下彼子孫已舉天下而歸我汝猶偃然負阻窮山而曰吾忠於所事不亦惑哉且昔此州之人不自為謀者以國有主耻被不義之名故爾得制其死命主今亡矣猶欲以是行之則戲下盜遇君竊君首以徼福一旦不難也珏未及報而德輝還王邸既而合州遣李興張邵十二人詞事成都皆獲之釋不殺復為書縱歸使諭其將王立如諭珏者而辭益剴切立亦計夙與東府有深怨懼誅即使興等導師

幹楊獅懷蠟書間至成都降德輝從兵纔數百人赴之
東府害其來皆曰公昔為書招珏誠亦極矣竟無功而
還今立珏牙校也習狙詐不信特以計致公來使與吾
爭垂成之功延命晷刻耳未必誠降德輝曰昔合以重
慶存故力可以同惡今已孤絕窮而來歸亦其勢然吾
非攘人之功者誠懼公等憤其後服誣以嘗抗蹕先朝
利其剽奪而快心於屠城也吾為國活此民豈計汝嫌
怒為哉即單舸濟江薄城下呼立出降安集其民而罷

置其吏合人自立而下家繪事之川蜀平復以王相還
邸十七年置行中書省以德輝為安西行省左丞是年
西南夷羅施鬼國既降復叛詔雲南湖廣四川合兵三
萬人討之兵且壓境德輝適被命在播乃遣安珪馳駟
止三道兵勿進復遣張孝思諭鬼國趣降其酋阿察熟
德輝名曰是活合州李公耶其言明信可恃即身至播
州泣且告曰吾屬百萬人微公來死且不降今得所歸
蔑有二矣德輝以其言上聞乃改鬼國為順元路以其

苗為宣撫使其後有以受鬼國馬千數譖德輝于朝者
帝曰是人朕所素知雖一羊不妄受寧有是耶德輝卒
年六十三蠻夷聞訃哭之哀如私親為位而祭者動輒
千百人合州安撫使王立衰經率吏民拜哭聲震山谷
為發百人護喪興元播州安撫使何彥清率其民立廟
祀之

張雄飛

張雄飛字鵬舉琅琊臨沂人父琮任金守盱眙金人疑

之罷其兵柄徙居許州尋復命守河陰仍留家人於許
雄飛幼失母琮妾李氏養之國兵屠許惟工匠得免有
田姓者琮故吏也自稱能為弓且許以雄飛及李氏為
家人由是護全遂徙朔方雄飛時方十歲至霍州李欲
逃恐其累已雄飛知之頃刻不去左右李乃變服與俱
還寓潞州雄飛既長往師前進士王寶英於趙城金亡
雄飛不知父所在往來澤潞求之十餘年常客食僧舍
已而入關陝歷懷孟潼華終求其父弗得遂入燕居數

歲盡通國言及諸部語至元二年廉希憲薦之于世祖
召見陳當世之務世祖大悅授同知平陽路轉運司事
搜抉蠹弊悉除之帝問處士羅英誰可大用者對曰張
雄飛真公輔器帝然之命驛召雄飛至問以當今所急
對曰太子天下本願早定以繫人心閭閻小人有升斗
之儲尚知付託天下至大社稷至重不早建儲貳非至
計也向使先帝知此陛下能有今日乎帝方卧矍然起
稱善者久之他日與江孝卿同召見帝曰今任職者多

非材政事廢弛譬之大厦將傾非良工不能扶卿輩能任此乎孝卿謝不敢當帝顧雄飛雄飛對曰古有御史臺為天子耳目凡政事得失民間疾苦皆得言百官姦邪貪穢不職者即糾劾之如此則紀綱舉天下治矣帝曰善乃立御史臺以前丞相塔齊爾為御史大夫雄飛為侍御史且戒之曰卿等既為臺官職在直言朕為汝君苟所行未善亦當極諫況百官乎汝宜知朕意人雖嫉妬汝朕能為汝地也雄飛益自感勵知無不言叅議

樞密院事費正寅素儉狻有告其罪者詔丞相錫津等
與雄飛雜治之請托交至雄飛無所顧盡得其罪狀以
聞正寅與其黨管如仁等皆伏誅會議立尚書省雄飛
力爭於帝前忤旨左遷同知京兆總管府事宗室公主
有家奴逃渭南民間為贅壻主適過臨潼識之捕其奴
與妻及妻之父母皆械繫之盡沒其家貲雄飛與主爭
辨辭色俱厲主不得已以奴妻及妻之父母家貲還之
惟挾其奴以去入為兵部尚書平章阿哈瑪特在制國

用司時與伊瑪都木達有隙至是羅織其罪同僚附會
雄飛不可曰所犯在制國用時平章獨不預耶衆無以
答秦長卿劉仲澤亦以忤阿哈瑪特皆下吏欲殺之雄
飛亦持不可阿哈瑪特使人啗之曰誠能殺此三人當
以叅政相處雄飛曰殺無罪以求大官吾不為也阿哈
瑪特怒奏出雄飛為澧州安撫使而三人竟死獄中時
澧州初下民懷反側雄飛至布宣德教民賴以安有巨
商二人犯匿稅及毆人事僚佐受賂欲寬其罪雄飛繩

之益急或曰此細事何執之堅雄飛曰吾非治匿稅歐
人者欲改宋弊政懲不畏法者耳細民以乏食羣聚發
富家廩所司欲論以強盜雄飛曰此盜食欲救死非強
也寬其獄全活者百餘人澧西南接溪洞獠人乘間抄
掠居民雄飛遣楊應申等往諭以威德諸獠咸感服十
四年改安撫使為總管府命雄飛為達嚕噶齊遷荆湖
北道宣慰使有告常德富民十餘家與德山寺僧將為
亂衆議以兵討之雄飛曰告者必其仇也且新附之民

當以靜鎮之兵不可遽用苟有他吾自任其責遂止徐
察之果如所言先是荊湖行省阿爾哈雅以降民三千
八百戶沒入為家奴自置吏治之歲責其租賦有司莫
敢言雄飛言於阿爾哈雅請歸其民於有司不從雄飛
奏其事詔還籍為民十六年拜御史中丞行御史臺事
阿哈瑪特以子呼遜為中書右丞行省江淮恐不為所
容奏留雄飛不遣改陝西漢中道提刑按察使未行阿
哈瑪特死朝臣皆以罪去拜叅知政事阿哈瑪特用事

日久賣官鬻獄紀綱大壞雄飛乃先自降一階於是僥倖超躐者皆降之呼遜有罪敕中貴人及中書雜問呼遜歷指宰執曰汝曾使我家錢物何得問我雄飛曰我曾受汝家錢物否曰公獨否雄飛曰如是則我當問汝矣呼遜遂伏辜二十一年春冊上尊號議大赦天下雄飛諫曰古人言無赦之國其刑必平故赦者不平之政也聖明在上豈宜數赦帝嘉納之語雄飛曰大獵而後見善射集議而後知能言汝所言者是朕今從汝遂止

降輕刑之詔雄飛剛直廉慎始終不易其節嘗坐省中詔趣召之見於便殿謂雄飛曰若卿可謂真廉者矣聞卿貧甚今特賜卿銀二千五百兩鈔二千五百貫雄飛拜謝將出又詔加賜金五十兩及金酒器雄飛受賜封識藏於家後阿哈瑪特之黨以雄飛罷政詣省乞追奪賜物裕宗在東宮聞之命叅政溫德亨諭丞相安圖曰上所以賜張雄飛者旌其廉也汝豈不知耶母為小人所詐塔奇呼阿薩爾請檢核前省錢穀復用阿塔瑪特

之黨竟矯詔追奪之塔奇呼阿薩爾等俄以罪誅帝慮
校核失當命近臣已顏閱之中書左丞耶律埒克勸雄
飛詣已延自辨雄飛曰上以老臣廉故賜臣然臣未嘗
敢輕用而封識以俟者政虞今日耳又可自辨乎時盧
世榮以言利進用雄飛與諸執政同日皆罷職二十三
年起為燕南湖北道宣慰使決壅滯黜姦貪政化大行
卒於官子五人師野師諤師白師儼師約師野宿衛東
宮時荆湖行省平章政事阿爾哈雅入覲言之宰相欲

白皇太子請以師野為荆南總管雄飛固止之歸謂師野曰今日欲有官汝者汝宿衛日久固應得官然我方為執政天下必以我私汝我一日不去此位汝輩勿望有官其介慎如此

張德輝

張德輝字輝卿冀寧交城人少力學數舉於鄉金貞祐間兵興家業殆盡試掾御史臺會盜殺卜者有司踪跡之獲僧匿一婦人榜掠誣服獄具德輝疑其冤其後果

得盜趙秉文楊慥咸器其材金亡北渡史天澤開府真
定辟為經歷官歲乙未從天澤南征籌畫調發多出德
輝天澤將誅逃兵德輝救止配令穴城光州華山農民
為寨以自固天澤議攻之德輝請招之降全活甚衆歲
丁未世祖在潛邸召見問曰孔子歿已久今其性安在
對曰聖人與天地終始無往不在殿下能行聖人之道
性即在是矣又問或云遼以釋廢金以儒亡有諸對曰
遼事臣未周知金季乃所親睹宰執中雖用一二儒臣

餘皆武弁世爵及論軍國大事又不使預聞大抵以儒進者三十之一國之存亡自有任其責者儒何咎焉世祖然之因問德輝曰祖宗法度具在而未盡設施者甚多將如之何德輝指銀槃喻曰創業之主如置此器精選白銀良匠規而成之畀付後人傳之無窮當求謹厚者司掌乃永為實用否則不惟缺壞亦恐有竊而去之者矣世祖良久曰此正吾心所不忘也又訪中國人材德輝舉魏璠元裕李冶等二十餘人又問農家作勞何

衣食之不贍德輝對曰農桑天下之本衣食之所從出者也男耕女織終歲勤苦擇其精者輸之官餘粗惡者將以仰事俯育而親民之吏復橫歛以盡之則民鮮有不凍餒者矣歲戊申春釋奠致胙於世祖世祖曰孔子廟食之禮何如對曰孔子為萬代王者師有國者尊之則嚴其廟貌修其時祀其崇與否於聖人無所損益但以此見時君崇儒重道之意何如耳世祖曰今而後此禮勿廢世祖又問典兵與宰民者為害孰甚對曰軍無

紀律縱使殘暴害固非輕若宰民者頭會箕歛以毒天下使祖宗之民如蹈水火為害尤甚世祖默然曰然則柰何對曰莫若更遣族人之賢如昆布哈者使掌兵權勲舊則如呼圖克者使主民政若此則天下均受其賜矣是年夏德輝得告將還更薦白文舉鄭顯之趙元德李造之高鳴李槃李濤數人陞辭又陳先務七事敦孝友擇人才察下情貴兼聽親君子信賞罰節財用世祖以字呼之賜坐錫賚優渥有頃奉旨教胄子博囉等壬

子德輝與元裕北覲請世祖為儒教大宗師世祖悅而受之因啓累朝有旨蠲儒戶兵賦乞令有司遵行從之仍命德輝提調真定學校世祖即位起德輝為河東南北路宣撫使下車擊豪強黜賊吏均賦役耆耄不遠數千里來見曰六十年不復見此太平官府矣戴之若神明西川帥納琳重取兵千餘人守吏畏其威莫敢申理隸鳳翔屯田者八百餘人屯罷兵不歸籍會僉防戍兵河中浮梁故有守卒不以充數悉條奏之帝可其請兵

後孱民多倚庇豪右及有以身傭藉衣食歲久掩為家
奴悉遣還之為民二年考績為十路最陞見帝勞之命
疏所急務條四事一曰嚴保舉以取人材二曰給俸祿
以養廉能三曰易世官而遷都邑四曰正刑罰而勿屢
赦帝嘉納焉遷東平路宣慰使春旱禱泰山而雨東平
賦夥獄繁視河東相倍蓰凡遇賊奸悉窮之不少貸奏
免遠輸豆粟二十萬斛和糶粟十萬斛保赫鼎議賦蠲
絲令民稅而復輸德輝曰是誣上以毒下也且後期之

責孰任之遂罷其事孀婦馬氏將鬻其女以代納逋賦
分已俸代償之仍蠲其額至元三年秋參議中書省事
五年春擢侍御史辭不拜有言沿邊將校冒代軍士虛
糜廩幣者勅按之奏曰在昔將校備嘗艱阻與士卒同
甘苦今年少子弟襲爵或以微勞進用豈知軍旅之事
乎政使朝廷遣使覆按此省院素失約束耳痛繩之則
人不自安第易其部署選武毅才略者任之庶使軍政
自新又時委司憲者體究庶草其弊有旨命德輝議御

史臺條例德輝奏曰御史執法官今法令未明何據而行此事行之不易陛下宜慎思之有頃復召曰朕慮之熟矣卿當力行之對曰必欲行之乞立宗正府以正皇族外戚得以糾彈女謁毋令奏事諸局承應人皆得究治帝良久曰其徐行之德輝請老命舉任風憲者疏烏庫哩貞等二十人以聞初河東歉請於朝發常平貸之并減其秋租有差賦役不均官吏並緣為姦賦一征十年不勝其困苦民率流亡德輝閱實戶編均其等第出

納有法數十年之弊一旦革去德輝天資剛直博學有
經濟器毅然不可犯望之知為端人性不喜嬉笑與元
裕李治游封龍山時人號為龍山三老云卒年八十

馬亨

馬亨字大用邢州南和人世業農以貲雄鄉里亨少孤
事母孝金季習為吏庚寅太宗始建十路徵收課稅使
河北東西路使王晉辟亨為掾以才幹稱甲午晉薦於
中書令耶律楚材授轉運司知事尋陞經歷擢轉運司

副使庚戌太保劉秉忠薦亨於世祖召見潛邸甚器之
既而籍諸路戶口以亨副已沁孟克撫諭西京太原平
陽及陝西五路俾民弗擾既還圖山川形勢以獻餘使
者多以賄敗惟亨等各賜衣九襲癸丑從世祖征雲南
留亨為京兆權課所長官京兆藩邸分地也亨以寬簡
治之不事培植凡五年民安而課裕丁巳憲宗遣阿勒
達爾等覈藩府錢穀亨時輦歲辦課銀五百錠輸之藩
府道出平陽適與之遇亨策曰見之則銀必拘留不見

則必以罪加我與其銀弗達王府寧獲罪焉避而過之
阿克達爾果怒遣使逮之王府世祖詢亨曰汝往得無
撫汝罪耶對曰無害願一行乃慰遣亨既至拘係之窮
治百端竟無所得惟以支竹課分例錢充公用及僦公
廨輦運腳價為不應勒償其直而已世祖知其誣更賜
銀三十二錠已未從世祖攻鄂州洎北還遣亨馳駟往
西京等處罷所僉軍并撫諭山西河東陝西漢中既還
復遣轉餉江上軍實中統元年世祖即位陝西四川立

宣撫司詔亨議陝司宣撫司事尋賜金符遷陝西四川
規措軍儲轉運使時阿勒達爾等叛亨與宣撫使廉希
憲商挺合謀誅劉太平等悉定關輔尋建行省命亨兼
陝西行省左右司郎中時興元畜糧五萬石欲轉餉大
安軍計傭直萬緡衆推亨往時丁內艱以攝省府事強
起之至則以兵官丁產均其役不閱月而事集無勞民
傷財之歎興元判官費正寅狡悍不法莫有能治之者
亨白省府欲以法繩之反誣搆行省前保關中有異謀

詔右丞鈕祜祿珪獻之亨辯之寃構釋然四年遷陝西
五路西蜀四川廉訪都轉運使未幾朝廷以考課檄諸
路轉運使至則併轉運司入總管府咸奪其制書授亨
工部侍郎解鹽副使亨乃上言以考課定賞罰其人甫
集而一切罷之則是非安在宜還其命書俾仕者有所
勸勉從之亨復上便宜六事一曰東宮保傅當用正人
以固國本二曰中書大政擇任儒臣以立朝綱三曰任
相惟賢官不必備今宰相至十七員宜加裁汰四曰左

右郎署毗贊大政今用豪貴子弟豈能贊襄五曰六曹之職分理萬機今止設左右二部事何由辦六曰建元以來便民條畫已多有司往往視為具文宜令憲司糾舉務在必行疏聞帝即召見有旨卿比安在胡不早言亨對曰新自陝西來覲帝諭曰卿久著忠勤自今不令卿遠出矣至元三年進嘉議大夫左三部尚書尋改戶部尚書金穀出納有條不紊時有賈胡恃制國用使阿哈瑪特欲貿交鈔本私平準之利以增歲課為辭帝以

問亨對曰交鈔可以權萬貨者法使然也法者主上之柄今使一賈擅之廢法從私將何以令天下事遂寢亨又言立常平義倉謂備荒之具宜亟舉行而時以財用不足止設義倉七年立尚書省仍以亨為尚書領左部亨上言尚書省專領金穀百工之事其銓選宜歸中書以示無濫尋為平章阿哈瑪特所忌以誣免官會國兵圍襄樊廷議河南行省調發軍餉詔以阿里為右丞姚樞為左丞亨為僉省任其事水陸供餽未嘗有闕亨之

力為多十年還京帝方欲柄用之遽嬰末疾十四年卒年七十一子紹庭雲南諸路肅政廉訪司副使

程思廉

程思廉字介甫其先洛陽人元魏時以豪右徙雲中遂家東勝州父恒國初佩金符為沿邊監權規運使解州鹽使思廉用太保劉秉忠薦給事裕宗潛邸以謹愿聞命為樞密院監印平章政事哈坦行省河南署為都事丞相史天澤尤器之時方規取襄樊使任轉餉築城置

倉以受粟轉輸者與民爭門不時至思廉令行者異路
粟至多露積一夕大雨思廉安卧不起省中召詰之思
廉曰此去敵近中夜騷動衆必驚疑或至他變縱有漂
濕不過軍中一日糧耳聞者疑之至元十二年調同知
淇州徙東平路判官入為監察御史以劾權臣阿哈瑪
特繫獄其黨巧為機穽思廉居之泰然卒不能害累遷
河北河南道按察副使道過彰德聞兩河饑而徵租益
急欲止之有司謂法當上請思廉曰若然民已不堪命

矣即移文罷徵後果得請二十年河北復大饑流民渡河求食朝廷遣使者集官屬絕河止之思廉曰民急就食豈得已哉天下一家河北河南皆吾民也亟令縱之且曰雖待罪死不恨章上不之罪也衛輝懷孟大水思廉臨視賑貸全活甚衆水及城不沒者數板即修隄防露宿督役水不為患衛人德之遷陝西漢中道按察使以母老不赴俄丁母憂二十六年立雲南行御史臺起復思廉為御史中丞始至蠻夷酋長來賀詞若遜而意

甚倨思廉奉宣上意綏懷遠人且明示禍福使毋自外
聞者懾服雲南舊有學校而禮教不興思廉力振起之
始有從學問禮者成宗即位除河東山西廉訪使太原
歲餉諸王駝馬一萬四千餘匹思廉為請止餉千匹平
陽諸郡歲輸租稅於北方民甚苦之思廉為請得輸河
東近倉舊法決事咸有議劄權歸曹吏思廉自判牘尾
某當某罪吏皆束手思廉累任風憲剛正疾惡言事剴
切如請早建儲貳訪求賢俊辦車服議封謚養軍力定

律令皆急務也與人交有終始或有疾病死喪問遺賻卹往返數百里不憚勞仍為之經紀家事撫視其子孫其於家族尤盡思意好薦達人物或者以為好名思廉曰若避好名之譏人不復敢為善矣卒年六十二諡敬肅

烏克遜澤

烏克遜澤字潤甫臨潢人其先女真烏克遜部因以為氏祖壁仕金為明威將軍資用庫使從金主遷汴汴梁

城陷徙大名父仲個儻有奇節遭金季世憤無所施用
高言危行親交避之遂縱酒佯狂以自晦然教澤特嚴
澤性剛毅讀書舉大略一切求諸已不事章句才幹過
人世祖將取江南澤以選輸鈔至淮南餉軍丞相阿珠
見而奇之補淮東大都督府掾至元十四年元帥索多
下兵閩越見澤與語而合即辟元帥府提控案牘時宋
廣王據福州改元炎興度我軍且至遂入于海復聚兵
甲子門其將張世傑攻泉州興化守臣陳瓚舉郡應之

文天祥置都督府於南劍州守臣張清行都督府事謀復建寧閩中郡縣往往復從宋江東大擾索多時軍浙東建信告急索多謀於衆曰我輩當何先澤曰彼據閩廣而我往浙右非策之善譬之伐木務除其根當先向南會行省檄索多與左丞達春會兵甲子門遂度兵閩關八戰而至南劍殺其守臣張清宋師遂退冬十月收福州進攻興化拔之索多怒其民反覆下令屠城澤屢諫不聽復前說曰世傑不虞我軍遽至方急攻泉州謀

固其植我新得泉州民志未固旦暮且失守比我定興
化整兵而南彼樹植將日固矣莫若開其遺民使走泉
南扇動之世傑將胆落而走是我戰而完泉州捷於
吾兵之馳救也索多喜開南門縱民去因得脫死者甚
衆世傑得逃民知興化已破乃解泉州圍去索多至泉
州部署別將裝大艦趣甲子門自將下漳州軍於海豐
引精騎與達春會十二月入廣州十五年春正月還擊
潮州守將馬發備禦甚固澤曰潮人所以城守不下者

以外多壁壘為之援應也第翦其外應潮必覆矣乃分
兵攻其一大壘破之餘壘盡散走二旬而潮拔馬發死
焉既而文天祥軍潰於江西廣王暨張世傑死於海中
索多還軍福建夏五月詔立行中書省於福建以索多
行叅知政事澤行省都事從朝京師命知興化軍賜金
織衣賞其善謀也繼改興化軍為路授澤行總管府事
民歌舞迎候於道曰是吾民復生之父母也喜極而繼
以泣郡新殘於兵白骨在野首下令掩埋之又衣食其

流離之民有棄子于道者置慈幼曹籍而撫育之郡中
惡年少喜為不義以資求竄名卒伍冀後得計功版授
官吏恐激變不敢詰澤悉追毀所授誅其尤無良者貪
暴始戢始陳瓚以郡應張世傑民多戰死者至是吏援
例將籍其產澤語吏曰國家至仁誅止陳瓚從瓚者猶
蒙宥民奈何連坐亟為令曰民不幸註誤從陳瓚誅及
鬪死無後者其田廬貲產竝給其族姻有司無所與吏
不能逆乃止當江南未定盜賊所在有之民自相什伍

保衛鄉里及時平行省議籍為兵上下洵澤白行省
曰國兵非少今籍民以示少非所以安反側也且當籍
者衆民或有他心議遂格澤又興學校召長老及諸生
講肄經義行鄉飲酒禮旁郡聞而慕之興化故號多士
士咸知嚮慕以澤與常袞方儀並肖像祠於學宮至元
二十一年調永州路判官湖廣平章政事約蘇穆爾貪
縱淫虐誅求無厭或妄言初歸附時州縣長吏及吏胥
富人比屋斂銀將輸之官而事乃中止約蘇穆爾即下

令責民自實使者旁午隨地置獄株連蔓引備極慘酷
民以考掠瘦死者載道所獲不貲約蘇穆爾盡掩有之
有使至永澤戒吏美供帳豐酒食務順適其意使者感
愧無所發其毒因間以利害曉之一郡由是獲安是歲
盜起寶慶武崗皆永旁郡也行省遣澤討平之俘獲五
百餘人簡出其誑誤者百有五十人上書言狀誅其首
惡者三十一人餘得減死二十六年丞相僧格議考校
錢穀天下騷動澤歎曰民不堪命矣即自上計行省約

蘇穆爾怒曰郡國錢糧無不增羨永州何為獨不然此直孫府判倚其才辨慢我亟拘繫之非死不釋也明年僧格敗約蘇穆爾伏誅澤始得釋二十九年湖廣平章政事奇爾濟蘇薦澤才堪將帥以行省員外郎從征海南黎黎人平軍還上功授廣南西道宣慰副使七月併左右兩道歸廣西宣慰使置元帥府澤為廣西兩江道宣慰副使僉都元帥府事兩江荒遠瘴癘與百夷接不知禮法澤作司規三十有二章以漸為教其民至今遵

守之又省廩置二十二所以紓民力歲饑上言蠲其田
租發象州賀州官粟三千五百石以賑饑者既發乃上
其事時行省平章哈喇哈斯察其心誠愛民不以專擅
罪之邕管徼外蠻數為寇澤循行並徼得阮塞處布畫
遠邇募民伉健者四千六百餘戶置雷留那扶十屯列
營堡以守之陂水墾田築八塌以節瀦洩得稻田若干
畝歲收穀若干石為軍儲邊民賴之海北元帥蘇察罕
賊利事覺行省檄澤驗治澤馳至雷州盡發其奸賊縱

所掠男女四百八十二口牛數千頭金銀器物稱是海
北之民欣忭相慶御史臺言烏克遜澤奉使知大體始
汲長孺為將計萬全如趙充國可屬大任詔擢為海北
海南廉訪使故例圭田至秋乃入租後遂計月受之澤
視事三月民輸租計米五百石澤曰夫子有言事君者
先其事後其食吾涖政日淺而受祿四倍非情所安量
食而入餘悉委學官給諸生以勸業常曰士非儉無以
養廉非廉無以養德身一布袍數年妻子朴素無華人

皆言之澤不以為意也雷州地近海潮汐齧其東南陂塘鰥農病焉而西北廣衍平袤宜為陂塘澤行視城陰曰三溪徒走海而不以灌溉此史起所以薄西門豹也乃教民浚故湖築大堤竭三溪瀦之為斗門七堤竭六以制其贏耗醲為渠一十有四以達其注輸渠皆支別為牖設守視者時其啓閉計得良田數千頃瀕海廣瀉竝為膏土民歌之曰烏鹵為田兮孫父之教渠之泱泱兮長我杭稻自今有生兮無旱無滯至大元年改福建

廉訪使澤宿有德于閩閩人安之有芝五色產於憲司之澄清堂士民以為澤之所致以母年踰八十求歸養長沙歲餘母喪澤以哀毀卒妻杜以夫死飲食不入口者十有三日不死乃復食澤積官自承德郎至中大夫諡正憲子良禎仕至中書右丞以功名終

趙炳

趙炳字彥明惠州灤陽人父弘有勇略國初為征行兵馬都元帥積階奉國上將軍炳幼失怙恃鞠於從兄歲

饑往平州就食遇盜欲殺之兄解衣就縛炳年十二泣請代兄盜驚異舍之而去甫弱冠以勲閥之子侍世祖於潛邸恪勤不急遂蒙眷遇世祖次桓撫間以炳為撫州長城邑規制為之一新己未王師伐宋未幾北方有警括兵斂財燕薊騷動王師北還炳遠迓中途具以事聞追所括兵及橫斂財物悉歸於民世祖嘉其志中統元年命判北京宣撫司事北京控制遼東蕃夷雜處號稱難治時叅知政事楊果為宣撫使聞炳至喜曰吾屬

無憂矣三年括北京鷹坊等戶丁為兵蠲其賦令炳總之時李壇叛據濟南炳請討之國兵圍城炳將千人獨當北面有所俘獲即縱遣去曰脅從之徒不足治也濟南平入為刑部侍郎兼中書省斷事官時有攜妓登龍舟者即按之以法未幾其人死其子犯蹕訴寃詔讓之炳曰臣執法尊君職當為也帝怒命之出既而謂侍臣曰炳用法太峻然非徇情者改樞密院斷事官濟南妖民作亂賜金虎符加昭勇大將軍濟南路總管炳至止

罪首惡餘黨解散歲凶發廩賑民而後以聞朝廷不之
罪也遷遼東提刑按察使遼東聞其來豪猾屏跡至元
九年帝念關中重地風俗强悍思得剛鯁舊臣以臨之
授炳京兆路總管兼府尹皇子安西王開府於秦詔治
官室悉聽炳裁製王府吏卒橫暴擾民者即建白繩以
法王命之曰後有犯者勿復啓請若自處之自是豪猾
斂戢秦民以安有旨以解州鹽賦給王府經費歲久積
逋二十餘萬緡有司追理僅獲三之一民已不堪炳密

啓王曰十年之逋責償一日其孰能堪與其裒歛病民孰若惠澤加於百姓王善其言遽命免征會王北伐詔以京兆一年之賦充軍資炳復請曰所徵逋課足佐軍用可貸歲賦以蘇民力令下秦民大悅十四年加鎮國上將軍安西王相王府冬居京兆夏徙六盤山歲以為常王既北伐六盤守者搆亂炳自京兆率兵往捕甫及再旬元惡授首十五年春六盤再亂復討平之王還自北嘉賞戰功賚賜有加是歲十一月王薨十六年秋被

旨入見便殿帝勞之曰卿去數載衰白若此關中事煩可知已詢及民間利病炳悉陳之因言王薨之後運使郭琮郎中郭叔雲竊弄威柄恣為不法帝卧聽遽起曰聞卿斯言使老者增健飲以上尊馬湏改中奉大夫安西王相兼陝西五路西蜀四川課程屯田事餘職如故即令乘傳偕勅使數人往按琮等至則琮假嗣王旨入炳罪收炳妻孥囚之時嗣王至六盤徙炳等於平原北崆峒山囚閉益嚴炳子仁榮訴於上即詔近侍二人馳

駟而西脫炳且械琮黨偕來琮等留使者醉以酒先遣人毒炳於平涼獄中其夜星隕有聲如雷年五十九實十七年三月也帝聞之撫髀歎曰失我良臣俄械琮等百餘人至帝視鞠問盡得其情既各伏辜命仁榮手刃琮叔雲於東城籍其家以付仁榮仁榮曰不共戴天之人所蓄之物皆取於民何忍受之帝善之別賜鈔二萬二千五百緡為治喪具國朝舊制無聘臣下禮蓋殊恩也六月詔雪炳寃特贈中書左丞諡忠愍子六人仁顯

早亡次仁表仁榮仁旭仁舉仁軌仁榮仕至中書平章
政事餘俱登顯仕

元史卷一百六十三

元史卷一百六十三考證

李德輝傳時汪德臣宿兵利州扼四川衿喉以窺進取

按汪德臣原刻作汪世顯係德臣之父卒於定宗

以前不應至憲宗時尚有宿兵利州之事考憲宗本

紀三年癸丑載汪德臣修治利州且屯田蜀人莫敢

侵軼與此事蹟年月皆合則世顯係德臣之訛今改

李德輝傳既而合州遣李興張郃十二人訶事成都

按張郃原刻作張郃考呂或傳載李德輝行西院

事於成都獲立偵卒張郃等數人將殺之或曰彼不
即降者以昔嘗抗命懼誅耳宜釋郃等歸俾諭立未
幾立果遣郃等齎蠟書至成都降是張郃係張郃之
訛今改

欽定四庫全書

元史卷一百六十四

明翰林學士亞中大夫知制誥兼修國史宋濂等修

列傳卷五十一

楊恭懿

楊恭懿字元甫奉元人力學強記日數千言雖從親逃
亂未嘗廢業年十七西還家貧服勞為養暇則就學書
無不讀尤深於易禮春秋後得朱熹集注四書歎曰人

倫日用之常天道性命之妙皆萃此書矣父歿水漿不入口者五日居喪盡禮宣撫司行省以掌書記辟不就至元七年與許衡俱被召恭懿不至衡拜中書左丞曰於右相安圖前稱譽恭懿之賢丞相以聞十年詔遣使召之以疾不起十一年太子下教中書俾如漢惠聘四皓者以聘恭懿丞相遣郎中張元智為書致命乃至京師既入見世祖遣國王和童勞其遠來繼又親詢其鄉里族氏師承子姓無不周悉十二年正月二日帝御香

殿以大軍南征使久不至命筮之其言秘侍讀學士圖克坦公履請設取士科詔與恭懿議之恭懿言明詔有謂士不治經學孔孟之道日為賦詩空文斯言誠萬世治安之本今欲取士宜勅有司舉有行檢通經史之士使無投牒自售試以經義論策夫既從事實學則士風淳民俗厚而國家得才矣奏入帝善之會北征恭懿遂歸田里十六年詔安西王相敦遣赴闕入見詔於太史院改歷十七年二月進奏曰臣等編考自漢以來歷書

四十餘家精思推算舊儀難用而新者未備故日行盈縮月行遲疾五行周天其詳皆未精察今權以新儀木表與舊儀所測相較得今歲冬至晷景及日躔所在與列舍分度之差大都北極之高下晝夜刻長短參以古制創立新法推算成辛巳歷雖或未精然比之前改歷者附會歷元更立日法全踵故習顧亦無愧然必每歲測驗修改積三十年庶盡其法可使如三代日官世專其職測驗良久無改歲之事矣又合朔議曰日行歷四

時一周謂之一歲月踰一周復與日合謂之一月言一月之始日月相合故為合朔自秦廢歷紀漢太初止用平朔法大小相間或有二大者故日食多在晦日或二日測驗時刻亦鮮中宋何承天測驗四十餘年進元嘉厯始以月行遲速定小餘以正朔望使食必在朔名定朔法有三大二小時以異舊法罷之梁虞翻造大同厯隋劉焯造皇極厯皆用定朔為時所阻唐傅仁均造戊寅厯定朔始得行貞觀十九年四月頻大人皆異之竟

改從平朔李淳風造麟德厯雖不用平朔遇四大則避人言以平朔間之又希合當世為進朔法使無元日之食至一行造大衍厯謂天事誠密四大三小何傷誠為確論然亦循常不改臣等更造新厯一依前賢定論推算皆改從實今十九年厯自八月後四月併大實日月合朔之數也詳見郭守敬傳是日方列跪未讀奏帝命許衡及恭懿起曰卿二老毋自勞也授集賢學士兼太史院事十八年辭歸二十年以太子賓客召二十二年

以昭文館學士領太史院事召三十九年以議中書省事召皆不行三十一年卒年七十

王恂

王恂字敬甫中山唐縣人父良金末為中山府掾時民遭亂後多以詿誤繫獄良前後所活數百人已而棄去吏業潛心伊洛之學及天文律歷無不精究年九十二卒恂性穎悟生三歲家人示以書帙輒識風丁二字母劉氏授以千字文再過目即成誦六歲就學十三學九

數輒造其極歲己酉太保劉秉忠北上途經中山見而
奇之及南還從秉忠學於磁之紫金山癸丑秉忠薦之
世祖召見於六盤山命輔導裕宗為太子伴讀中統二
年擢太子贊善時年二十八三年裕宗封燕王守中書
令兼判樞密院事勅兩府大臣凡有咨稟必令王恂與
聞初中書左丞許衡集唐虞以來嘉言善政為書以進
世祖嘗令恂講解且命太子受業焉又詔恂與太子起
居飲食慎為調護非所宜接之人勿令得侍左右恂言

太子天下本付託重任當延名德與之居處汎兼領中書樞密之政詔條所當徧覽庶務亦當屢省官吏以罪免者毋使更進軍官害人改用之際尤不可非其人民至愚而神變亂之餘吾不之疑則反覆化為忠厚帝深然之恂早以算術名裕宗嘗問焉恂曰算數六藝之一定國家安人民乃大事也每侍左右必發明三綱五常為學之道及歷代治忽興亡之所以然又以遼金之事近接耳目者區別其善惡論著其得失上之裕宗問以

心之所守恂曰許衡嘗言人心如印板惟板本不差則雖摹千萬紙皆不差本既差則摹之於紙無不差者裕宗深然之詔擇勲戚子弟使學於恂師道卓然及恂從裕宗撫軍青海乃以諸生屬之許衡及衡告老而去復命恂領國子祭酒國學之制實始於此帝以國朝承用金大明歷歲久寢疏欲釐正之知恂精於算術遂以命之恂薦許衡能明歷之理詔驛召赴闕命領改歷事官屬悉聽恂辟置恂與衡及楊恭懿郭守敬等編考歷書

四十餘家晝夜測驗創立新法參以古制推算極為精密詳在守敬傳十六年授嘉議大夫太史令十七年歷成賜名授時歷以其年冬頒行天下十八年居父喪哀毀日飲勺水帝遣內侍慰諭之未幾卒年四十七初恂病裕宗屢遣醫診治及葬賻鈔二千貫後帝思定歷之功以鈔五千貫賜其家延祐二年贈推忠守正功臣光祿大夫司徒上柱國定國公諡文肅子寬賓並從許衡游得星歷之傳於家學裕宗嘗召見語之曰汝父起於

書生貧無貲蓄今賜汝鈔五千貫用盡可復以聞恩恤之厚如此寬由保章正歷兵部郎中知蠡州賓由保章副累遷秘書監

郭守敬

郭守敬字若思順德邢臺人生有異操不為嬉戲事大父榮通五經精算數水利時劉秉忠張文謙張易王恂皆同學於州西紫金山榮使守敬從秉忠學中統三年文謙薦守敬習水利巧思絕人世祖召見面陳水利六

事其一中都舊漕河東至通州引玉泉水以通舟楫可
省僱車錢六萬緡通州以南於蘭榆河口徑直開引由
蒙村跳梁務至楊村還河以避浮難洶盤淺風浪遠轉
之患其二順德達活泉引入城中分為三渠灌城東地
其三順德澧河東至古任城失故道沒民田千三百餘
頃此水開修成河其田即可耕種自小王村徑淳沱合
入御河通行舟楫其四磁州東北滏漳二水合流處引
水由滏陽邯鄲洺州永年下經鷄澤合入澧河可灌田

三千餘頃其五懷孟沁河雖澆灌猶有漏堰餘水東與丹河餘水相合引東流至武陟縣北合入御河可灌田二千餘頃其六黃河自孟州西開引少分一渠經由新舊孟州中間順河古岸下至溫縣南復入大河其間亦可灌田二千餘頃每奏一事世祖歎曰任事者如此人不為素餐矣授提舉諸路河渠四年加授銀符副河渠使至元元年從張文謙行省西夏先是古渠在中興者一名唐來其長四百里一名漢延長二百五十里它州

正渠十皆長二百里支渠大小六十八灌田九萬餘頃
兵亂以來廢壞淤淺守敬更立牐堰皆復其舊二年授
都水少監守敬言舟自中興沿河四晝夜至東勝可通
漕運及見查泊烏梁海古渠甚多宜加修理又言金時
自燕京至西麻峪村分引盧溝一支東流穿西山而出
是謂金口其水自金口以東燕京以北灌田若干頃其
利不可勝計兵興以來興守者懼有所失因以大石塞
之今若按視故蹟使水得通流上可以致西山之利下

可以廣京畿之漕又言當於金口西預開減水口西南還大河令其深廣以防漲水突入之惠帝善之十二年丞相巴延南征議立水站命守敬行視河北山東可通舟者為圖奏之初秉忠以大明厯自遼金承用二百餘年寢以後天議欲脩正而卒十三年江左既平帝思用其言遂以守敬與王恂率南北日官分掌測驗推步於下而命文謙與樞密張易為之主領裁奏於上左丞許衡參預其事守敬首言厯之本在于測驗而測驗之器

莫先儀表今司天渾儀宋皇祐中汴京所造不與此處
天度相符比量南北二極約差四度表石年深亦復欹
側守敬乃盡考其失而移置之既又別圖高爽地以木
為重棚創作簡儀高表用相比復又以為天樞附極而
動昔人嘗展管望之未得其的作候極儀極辰既位天
體斯正作渾天象象雖形似莫適所用作玲瓏儀以表
之矩方測天之正圜莫若以圜求圜作仰儀古有經緯
結而不動守敬易之作立運儀日有中道月有九行守

敬一之作證理儀表高景虛罔象非真作景符月雖有
明察景則難作闕几厯法之驗在於交會作日月食儀
天有赤道輪以當之兩極低昂標以指之作星晷定時
儀又作正方案九表懸正儀座正儀為四方行測者所
用又作仰規覆矩圖異方渾蓋圖日出入永短圖與上
諸儀互相參攷十六年改局為太史院以恂為太史令
守敬為同知太史院事給印章立官府及奏進儀表式
守敬當帝前指陳理致至於日晏帝不為倦守敬因奏

唐一行開元間令南宮說天下測景書中見者凡十三處今疆宇比唐尤大若不遠方測驗日月交食分數時刻不同晝夜長短不同日月星辰去天高下不同即目測驗人少可先南北立表取直測景帝可其奏遂設監候官一十四員分道而出東至高麗西極滇池南踰朱崖北盡鐵勒四海測驗凡二十七所十七年新厯告成守敬與諸臣同上奏曰臣等竊聞帝王之事莫重於厯自黃帝迎日推策帝堯以閏月定四時成歲舜在璿璣

玉衡以齊七政爰及三代厯無定法周秦之間閏餘乖次西漢造三統厯百三十年而後是非始定東漢造四分厯七十餘年而儀式方備又百二十一年劉洪造乾象厯始悟月行有遲速又百八十年姜岌造三紀甲子厯始悟以月食衝檢日宿度所在又五十七年何承天造元嘉厯始悟以朔望及弦皆定大小餘又六十五年祖冲之造大明厯始悟太陽有歲差之數極星去不動處一度餘又五十二年張子信始悟日月交道有表裏

五星有遲疾留逆又三十三年劉焯造皇極歷始悟日
行有盈縮又三十五年傅仁均造戊寅元歷頗采舊儀
始用定朔又四十六年李淳風造麟德歷以古歷章節
元首分度不齊始為總法用進朔以避晦晨月見又六
十三年一行造大衍歷始以朔有四大三小定九服交
食之異又九十四年徐昂造宣明歷始悟日食有氣刻
時三差又二百三十六年姚舜輔造紀元歷始悟食甚
泛餘差數以上計千一百八十二年歷經七十改其創

法者十三家自是又百七十四年聖朝專命臣等政治
新歷臣等用創造簡儀高表憑其測到實數所考正者
七事一曰冬至自丙子年立冬後依每日測到晷景逐
日取對冬至前後日差同者為準得丁丑年冬至在戊
戌日夜半後八刻半又定丁丑夏至在庚子日夜半後
七十刻又定戊寅冬至在癸卯日夜半後三十三刻己
卯冬至在戊申日夜半後五十七刻庚辰冬至在癸丑
日夜半後八十一刻各減大明歷十八刻遠近相符前

後應準二曰歲餘自大明厯以來凡測景驗氣得冬至時刻真數者有六用以相距各得其時合用歲餘今考驗四年相符不差仍自宋大明壬寅年距至今日八百一十年每歲合得三百六十五日二十四刻二十五分其二十五分為今厯歲餘合用之數三曰日躔用至元丁丑四月癸酉望月食既推求日躔得冬至日躔赤道箕宿十度黃道箕九度有奇仍憑每日測到太陽躔度或憑星測月或憑月測日或徑憑星度測日立術推算

起自丁丑正月至己卯十二月凡三年共得一百三十
四事皆躔於箕與月食相符四曰月離自丁丑以來至
今憑每日測到逐時太陰行度推算變從黃道求入轉
極遲疾并平行處前後凡十三轉計五十一事內除去
不真的外有三十事得大明厯入轉後天又因考驗交
食加大明厯三十刻與黃道合五曰入交自丁丑五月
以來憑每日測到太陽去極度數比擬黃道去極度得
月道交於黃道共得八事仍依日食法度推求皆有食

分得入交時刻與大明歷所差不多六日二十八宿距
度自漢太初歷以來距度不同互有損益大明歷則於
度下餘分附以太半少皆私意牽就未嘗實測其數今
新儀皆細刻周天度分每度為三十六分以距線代管
窺宿度餘分並依實測不以私意牽就七曰日出入晝
夜刻大明歷日出入晝夜刻皆據汴京為準其刻數與
大都不同今更以本方北極出地高下黃道出入內外
度立術推求每日日出入晝夜刻得夏至極長日出寅

正二刻日入戌初二刻晝六十二刻夜三十八刻冬至
極短日出辰初二刻日入申正二刻晝三十八刻夜六
十二刻永為定式所創法凡五事一曰太陽盈縮用四
正定氣立為升降限依立招差求得每日行分初末極
差積度比古為密二曰月行遲疾古厯皆用二十八限
今以萬分日之八百二十分為一限凡析為三百三十
六限依垛疊招差求得轉分進退其遲疾度數逐時不
同蓋前所未有三曰黃赤道差舊法以一百一度相減

相乘今依算術句股弧矢方圓斜直所容求到度率積
差差率與天道實脗合四曰黃赤道內外度據累年實
測內外極度二十三度九十分以圓容方直矢接句股
為法求每日去極與所測相符五曰白道交周舊法黃
道變推白道以斜求斜今用立渾比量得月與赤道正
交距春秋二正黃赤道正交一十四度六十六分擬以
為法推逐月每交二十八宿度分於理為盡十九年恂
卒時歷雖頒然其推步之式與夫立成之數尚皆未有

定藁守敬於是比次篇類整齊分抄裁為推步七卷立
成二卷厯議擬藁三卷轉神選擇二卷上中下三厯注
式十二卷二十三年繼為太史令遂上表奏進又有時
候箋注二卷修改源流一卷其測驗書有儀象法式二
卷二至晷景考二十卷五星細行考五十卷古今交食
考一卷新測二十八舍雜座諸星入宿去極一卷新測
無名諸星一卷月離考一卷竝藏之官二十八年有言
灤河自永平挽舟踰山而上可至開平有言盧溝自麻

峪可至尋麻林朝廷遣守敬相視灤河既不可行盧溝
舟亦不通守敬因陳水利十有一事其一大都運糧河
不用一畝泉舊原別引北山白浮泉水西折而南及翁
山泊自西水門入城環匯於積水潭復東折而南出南
水門合入舊運糧河每十里置一肺比至通州凡為肺
七距肺里許上重置斗門互為提闕以過舟止水帝覽
奏喜曰當速行之於是復置都水監俾守敬領之帝命
丞相以下皆親操畚鍤倡工待守敬指授而後行事先

是通州至大都陸運官糧歲若干萬石方秋霖雨驢畜死者不可勝計至是皆罷之三十年帝還自上都過積水潭見舳艫蔽水大悅名曰通惠河賜守敬鈔萬二千五百貫仍以舊職兼提調通惠河漕運事守敬又言於澄清脾稍東引水與北渠河接且立脾麗正門西令舟楫得環城往來志不就而罷三十一年拜昭文館大學士知太史院事大德二年召守敬至上都議開鐵幡竿渠守敬奏山水頻年暴下非大為渠堰廣五七十步不

可執政吝於工費以其言為過縮其廣三之一明年大雨山水注下渠不能容漂没人畜廬帳幾犯行殿成宗謂宰臣曰郭太史神人也惜其言不用耳七年詔内外官年及七十竝聽致仕獨守敬不許其請自是翰林太史司天官不致仕定著為令延祐三年卒年八十六

楊桓

楊桓字武子克州人幼警悟讀論語至宰予晝寢章慨然有立志由是終身非疾病未嘗晝寢弱冠為郡諸生

一時名公咸稱譽之中統四年補濟州教授後由濟寧路教授召為太史院校書郎奉敕撰儀表銘厯日序文辭典雅賜楮幣千五百緡辭不受遷秘書監丞至元三十一年拜監察御史有得玉璽於穆呼哩曾孫碩德家者桓辨識其文曰受天之命既壽永昌乃頓首言曰此歷代傳國璽也亡之久矣今宮車晏駕皇太孫龍飛而璽復出天其彰瑞應於今日乎即為文述璽始末奉上于徽仁裕聖皇后成宗即位桓疏上時務二十一事一

曰郊祀天地二曰親享太廟備四時之祭三曰先定首相四曰朝見群臣訪問時政得失五曰詔儒臣以時侍講六曰設太學及府州儒學教養生徒七曰行誥命以褒善叙勞八曰異章服以別貴賤九曰正禮儀以肅宮庭十曰定官制以省内外冗員十一曰講究錢穀以裕國用十二曰訪求曉習音律者以協太常雅樂十三曰國子監不可隸集賢院宜正其名十四曰試補六部寺監及府州司縣吏十五曰增内外官吏俸祿十六曰禁

父子骨肉奴婢相告訐者十七曰定婚姻聘財十八曰
罷行用官錢營什一之利十九曰復笞杖以別輕重之
罪二十曰郡縣吏自中統前仕宦者宜加優異二十一
曰為治之道宜各從本俗疏奏帝嘉納之未幾陞秘書
少監預修大一統志秩滿歸兗州以資業悉讓弟楷鄉
里稱焉大德三年以國子司業召未赴卒年六十六桓
為人寬厚事親篤孝博覽群籍尤精篆籀之學著六書
統六書沂源書學正韻大抵推明許慎之說而意加深

皆行于世

楊果

楊果字正卿祁州蒲陰人幼失怙恃自宋遷亳復徙居許昌以章句授徒為業流寓輒軻十餘年金正大甲申登進士第會叅政李蹊行大司農於許果以詩送之蹊大稱賞歸言於朝用為偃師令到官以廉幹稱改滿城改陝皆劇縣也果有應變材能治煩劇諸縣以果治效為最金亡歲己丑楊與徵河南課稅起果為經歷未幾

史天澤經略河南果為叅議時兵革之餘法度草創果
隨宜贊畫民賴以安世祖中統元年設十道宣撫使命
果為北京宣撫使明年拜叅知政事及例罷猶詔與左
丞姚樞等日赴省議事至元六年出為懷孟路總管大
修學廟以前嘗為中書執政官移文申部特不署名以
老致政卒于家年七十五諡文獻果性聰敏美風姿工
文章尤長於樂府外若沈默內懷智用善諧謔聞者絕
倒微時避亂河南娶羈旅中女後登科歷顯仕竟與偕

老不易其初心人以是稱之有西菴集行於世

王構

王構字肯堂東平人父公淵遭金末之亂其兄三人挈家南奔公淵獨誓死守墳墓伏草莽中諸兄呼之不出號慟而去卒得存其家而三兄不知所終構少穎悟風度凝厚學問該博文章典雅弱冠以詞賦中選為東平行臺掌書記叅政賈居貞一見器重俾其子受學焉至元十一年授翰林國史院編修官時遣丞相巴延伐宋

先下詔讓之命構屬草以進世祖大悅宋亡構與李槃
同被旨至杭取三館圖籍太常天章禮器儀仗歸于京
師凡所薦拔皆時之名士十三年秋還入覲遷應奉翰
林文士陞修撰丞相和爾果斯由翰林學士承旨拜司
徒辟構為司直時丞相阿哈瑪特為盜擊死世祖亦悟
其姦復相和爾果斯更張庶務構之謀畫居多歷吏禮
郎中審囚河南多所平反改太常少卿定親享太廟儀
注擢淮東提刑按察副使召見便殿親授制書賜上尊

酒以遣之尋以治書侍御史召屬僧格為相俾其平章博果密檢覆燕南錢穀而督其逋負以十一月晦行期歲終復命明年春還宿盧溝驛度逾期禍且不測謂博果密曰設有罪構當以身任之不以累公也會僧格死乃免有旨出銓選江西入翰林為侍講學士世祖崩構撰謚冊成宗立由侍講為學士纂修實錄書成叅議中書省事時南士有陳利便請搜括田賦者執政欲從之構與平章何榮祖共言其不可辨之甚力得不行以疾

歸東平久之起為濟南路總管諸王從者怙勢行州縣民莫敢忤視構聞諸朝徙之北境學田為牧地所侵者理而歸之官貸民粟歲飢而責償不已構請輸以明年武宗即位以纂修國史趣召赴闕拜翰林學士承旨未幾以疾卒年六十三構歷事三朝練習臺閣典故凡祖宗謚議冊文皆所撰定朝廷每有大議必咨訪焉喜薦引寒士前後省臺翰苑所辟無慮數十人後居清要皆有名于時子士熙仕至中書叅政卒官南臺御史中丞

士黜淮西廉訪司僉事皆能以文學世其家

魏初

魏初字大初弘州順聖人從祖璠金貞祐三年進士補尚書省令史金宣宗求直言璠首論將相非人及不當立德陵事疏奏不報後復上言國勢危逼四方未聞有勤王之舉隴右地險食足其帥完顏呼沙呼亦可委仗宜遣人往諭大計大臣不悅而止閱數月呼沙呼兵來援已無及金主悔焉金將武仙軍次五塚山不進求使

仙者或薦璫即授朝列大夫翰林修撰給騎四人以從至則仙已遁去部曲亦多散亡璫撫循招集得數千人推其中材勇者為帥長仍制符印予之以矯制自効金主謂其處置得宜繼聞仙率餘衆保留山璫直趣仙所宣諭之或讒於仙謂璫欲奪其軍仙怒命士拔刃若欲鏖璫然且引一吏與璫辨璫不為動大言曰王人雖微序于諸侯之上將軍縱不加禮柰何聽讒邪之言欲以小吏置對耶且將軍跳山谷而左右無異心者以天子

大臣故也苟不知尊天子安知麾下無如將軍者不然
吾有死無辱命仙不能屈璠復激使進兵不應比還金
主已遷歸德復遷蔡州金亡璠無所歸乃北還鄉里庚
戌歲世祖居潛邸聞璠名徵至和琳訪以當世之務璠
條陳便宜三十餘事舉名士六十餘人以對世祖嘉納
後多采用焉以疾卒于和琳年七十賜謚靖肅初其從
孫也璠無子以初為後初好讀書尤長於春秋為文簡
而有法比冠有聲中統元年始立中書省辟為掾史兼

掌書記未幾以祖母老辭歸隱居教授會詔左丞許衡
學士竇默及京師諸儒各陳經史所載前代帝王嘉言
善政選進讀之士有司以初應詔帝雅重璠名方之古
直詢知初為璠後歎獎久之即授國史院編修官尋拜
監察御史首言法者持天下之具御史臺則守法之司
也方今法有未定百司無所持循宜叅酌考定頒行天
下帝宴羣臣於上都行宮有不能酬大庖者免其冠服
初上疏曰臣聞君猶天也臣猶地也尊卑之禮不可不

肅方今內有太常有史官有起居注以議典禮記言動
外有高麗安南使者入貢以觀中國之儀昨聞錫宴大
臣威儀弗謹非所以尊朝廷正上下也疏入帝欣納之
仍諭侍臣自今無復為此舉時襄樊未下將括民為兵
或請自大興始初言京師天下之本要在殷盛建邦之
初詎宜騷動遂免括大興兵初又言舊制常叅官諸州
刺史上任三日舉一人自代況風紀之職與常員異請
自今監察御史按察司官在任一歲各舉一人自代所

舉不當有罰不惟砥礪風節亦可為國得人遂舉勸農副使劉宣自代出僉陝西四川按察司事歷陝西河東按察副使入為治書侍御史又以侍御史行御史臺事于揚州擢江西按察使尋徵拜侍御史行臺移建康出為中丞卒年六十一子必復集賢侍講學士

焦養直

焦養直字無咎東昌堂邑人夙以才器稱至元十八年世祖改符寶郎為典瑞監思得一儒者居之近臣有以

養直薦者帝即命召見數對稱旨以真定路儒學教授
超拜典瑞少監二十四年從征納延二十八年賜宅一
區入侍帷幄陳說古先帝王政治帝聽之每忘倦嘗語
及漢高帝起自側微誦所舊聞養直從容論辨帝即開
納由是不薄高帝大德元年成宗幸柳林命養直進講
資治通鑑因陳規諫之言詔賜酒及鈔萬七千五百貫
二年賜金帶象笏三年遷集賢侍講學士賜通犀帶七
年詔傳太子於宮中啓沃誠至帝聞之大悅八年代祀

南海九年進集賢學士十一年陞太子諭德至大元年授集賢大學士謀議大政悉與焉告老歸而卒贈資德大夫河南等處行中書省右丞諡文靖子德方以廕為興國路總管府判官

孟攀鱗

孟攀鱗字駕之雲內人曾祖彥甫以明法為西北路招討司知事有疑獄當死者百餘人彥甫執不從後三日得實皆釋之祖鶴父澤民皆金進士攀鱗幼日誦萬言

能綴文時號竒童金正大七年擢進士第仕至朝散大夫招討使歲壬辰汴京下北歸居平陽丙午為陝西帥府詳議官遂家長安世祖中統三年授翰林待制同修國史至元初召見條陳七十事大抵勸上以郊祀天地祠太廟制禮樂建學校行科舉擇守令以字民儲米粟以贍軍省無名之賦罷不急之役百司庶府統於六部紀綱制度悉由中書是為長久之計世祖悉嘉納之咨問諄諄後論王百一許仲平優劣對曰百一文華之士

可置翰苑仲平明經傳道可為後學矜式帝深然之又
嘗召問宗廟郊祀儀制攀鱗悉據經典以對時帝將親
祀詔命攀鱗會太常議定禮儀攀鱗夜畫郊祀及宗廟
圖以進帝皆親覽焉復以病請西歸帝令就議陝西五
路四川行中書省事四年卒年六十四延祐三年贈翰
林學士承旨資德大夫上護軍平原郡公諡文定

尚野

尚野字文蔚其先保定人徙滿城野幼穎異祖母劉厚

資之使就學至元十八年以處士徵為國史院編修官
二十年兼興文署丞出為汝州判官廉介有為憲司屢
薦之二十八年遷南陽縣尹初至官獄訟克斥野裁決
無留滯涉旬遂無事改懷孟河渠副使會遣使問民疾
苦野建言水利有成法宜隸有司不宜復置河渠官事
聞于朝河渠官遂罷大德六年遷國子助教諸生入宿
衛者歲從幸上都丞相哈喇哈斯始命野分學于上都
以教諸生仍鑄印給之上都分學自野始俄陞國子博

士誨人先經學而後文藝每謂諸生曰學未有得徒事華藻若持錢買水所取有限能自鑿井及泉而汲之不可勝用矣時學舍未備野密請御史臺乞出帑藏所積大建學舍以廣教育仁宗在東宮野為太子文學多所裨益時從賓客姚燧諭德蕭𧫖入見帝為加禮至大元年除國子司業近臣奏分國學西序為大都路學帝已可其奏野謂國學府學混居不合禮制事遂寢四年拜翰林直學士知制誥同修國史詔野赴吏部試用廕補


官野多所優假或病其太寬野曰今初設此法冀將來者習詩書知禮義耳非必責效目前也衆乃服皇慶元年陞翰林侍講學士延祐元年改集賢侍講學士兼國子祭酒二年夏移疾歸滿城四方來學者益衆六年卒于家年七十六贈通奉大夫太常禮儀院使護軍追封上黨郡公諡文懿野性開敏志趣正大事繼母以孝聞文辭典雅一本於理子師易蘄州路總管府判官師簡中奉大夫奎章閣侍書學士同知經筵事

李之紹

李之紹字伯宗東平平陰人自幼穎悟聰敏從東平李謙學家貧教授鄉里學者咸集至元三十一年纂修世祖實錄徵名儒充史職以馬紹李謙薦授將仕佐郎翰林國史院編修官直學士姚燧欲試其才凡翰林應酬之文積十餘事併以付之之紹援筆立成併以藁進燧驚喜曰可謂名下無虛士也大德二年間祖母疾辭歸復除編修官陞將仕郎六年陞應奉翰林文字七年遷

太常博士九年丁母憂累起復終不能奪至大三年仍
授太常博士階承事郎四年陞承直郎翰林待制皇慶
元年遷國子司業延祐三年陞奉政大夫國子祭酒夙
夜孳孳惟以教育人材為心四年十二月陞朝列大夫
同僉太常禮儀院事六年改翰林直學士復以疾還七
年召為翰林直學士至治二年陞翰林侍講學士知制
誥同修國史三年告老而歸泰定三年八月卒年七十
三子勗蔭父職同知諸暨州事之紹平日自以其性遇

事優游少斷故號果齋以自勵有文集藏于家



元史卷一百六十四

元史卷一百六十四考證

楊恭懿傳附會厯元更立日法 按厯元原刻作元厯
更立日法原刻作更日立法考姚燧撰恭懿神道碑
云昔之治厯必先立元次定日法賈逵議其守一元
不與天消息又云今不用厯元日法志所載亦同原
刻倒置無疑今據改

楊恭懿傳謂天事誠密四大三小何傷 按三小原刻
作二小考神道碑載李淳風麟德之制推得四大三

小又一行云四大三小何害志所載亦同今據改

郭守敬傳順德達活泉引入城中 按達活原刻脫活

字今據畿輔通志增

郭守敬傳百三十年而後是非始定 按三十原刻訛

二十與下文千一百八十二年總數不符考三統歷

作于漢太初元年計至東漢之初以百三十年為是

與總數亦合今據行狀改

郭守敬傳又二百三十六年姚舜輔造紀元歷 按原

刻無二字與下文千一百八十二年數不相符考宣
明厯作於唐長慶二年紀元厯作於宋崇寧五年中
間相距實二百七十五年雖有小差究為近是且與
總數符合今據行狀增

欽定四庫全書

史部

元史卷一百六十五至

檢討臣翁樹培覆勘

總校官編修臣朱鈴

欽定四庫全書

元史卷一百六十五

明翰林學士亞中大夫知制誥兼修國史宋濂等修

列傳第五十二

張禧

字弘綱

張禧東安州人父仁義金末徙家益都及太宗下山東
仁義乃走信安時燕薊已下獨信安猶為金守其主將
知仁義勇而有謀用之左右國兵圍信安仁義率敢死

士三百開門出戰圍解以功署軍馬總管守信安踰十年度不能支乃與主將舉城內附率其部曲從宗王哈坦平定河南授管軍元帥後攻歸德飛矢入口折其二齒鏃出項後卒賜爵縣侯禧年十六從大將額斯倫南攻徐州歸德復從元帥察罕攻壽春安豐廬滁黃泗諸州皆有功禧素峭直為主將所忌誣以他罪欲寘之法時王鶚侍世祖於潛邸禧密往依之鶚請左丞庫庫薦禧與其子弘綱俱入見歲己未從世祖南伐濟江與宋

兵始接戰即擒其一將進攻鄂州諸軍穴城以入宋樹
柵為夾城於內入戰者輒不利乃命以厚賞募敢死士
禧與子弘綱俱應募由城東南入戰將至城下帝憫其
父子俱入險地遣阿爾哈雅諭禧父子止一人進戰禧
所執槍中弩矢而折取弘綱槍以入破城東南角有逗
留不進者十餘人立城下弘綱復奪其槍入轉戰良久
禧身中十八矢一矢鏃貫腹悶絕復甦曰得血竭飲之
血出可生世祖亟命取血竭遣人往療之瘡既愈復從

大將鼎喇古與宋兵戰于金口李家洲皆捷世祖即位
賜金符授新軍千戶三年從征李璫時宋乘璫叛遣夏
貴襲取蘄縣宿州等城禧移兵攻之貴走盡復諸城至
元元年陞唐鄧等州盧氏保甲丁壯軍總管宋侵均州
總管李玉山敗走帝命禧代之三年與宋將呂文煥戰
于高頭赤山乘勝復均州四年改水軍總管益其軍二
千五百令習水戰五年從攻襄樊六年七月夏貴率兵
援襄陽禧從元帥阿珠戰却之八年江水暴溢宋遣范

文虎以戰艦千餘艘來援元帥阿珠命禧率輕舟夜銜
枚入其陣中插葦以識水之深淺及還阿珠即命禧率
四翼水軍進戰宋兵潰追至淺水奪戰艦七十餘艘九
年攻樊城焚其串樓敗宋將張貴于鹿門山十年行省
集諸將問破襄陽之策禧言襄樊夾漢江而城敵人橫
鐵鎖置木楸于水中今斷鎖毀楸以絕其援則樊城必
下樊城下則襄陽可圖矣行省用其計乃破樊城而襄
陽繼降帝遣使錄諸將功授宣武將軍水軍萬戶佩金

虎符丞相巴延因命禧為水軍先鋒十二年敗宋將孫
虎臣于丁家洲尋移屯黃池以斷宋救兵九月從阿珠
與宋都統姜才戰有功加信武將軍十三年從下溫台
福建十四年加懷遠大將軍江陰路達魯噶齊水軍萬
戶十六年入朝進昭勇大將軍招討使十八年加鎮國
上將軍都元帥時朝廷議征日本禧請行即日拜行中
書省平章政事與右丞范文虎左丞李庭同率舟師泛
海東征至日本禧即捨舟築壘平湖島約束戰艦各相

去五十步止泊以避風濤觸擊八月颶風大作文虎庭
戰艦悉壞禧所部獨完文虎等議還禧曰士卒溺死者
半其脫死者皆壯士也曷若乘其無回顧心因糧於敵
以進戰文虎等不從曰還朝問罪我輩當之公不與也
禧乃分船與之時平湖島屯兵四千乏舟禧曰我安忍
棄之遂悉棄舟中所有馬七十匹以濟其還至京師文
虎等皆獲罪禧獨免子弘綱字憲臣年十八父禧為主
將所誣繫獄將殺之弘綱直入獄中獄卒併繫之弘綱

佯狂譴笑守者易之既寢遂與其父逸去後從其父攻城徇地屢有功自昭信校尉管軍總把佩銀符換金符為千戶陞總管廣威將軍招討副使加定遠大將軍招討使襲鎮江陰盜起安吉弘綱率兵往捕未踰旬擒之從叅政高興破建德溪寨諸賊後賜三珠虎符授昭勇大將軍河南諸翼征行萬戶從右丞劉深征八百媳婦國師次八番與叛蠻宋隆濟等力戰而歿贈宣忠秉義功臣資善大夫湖廣等處行中書省左丞上護軍追封

齊郡公謚武宣子漢當襲職讓其弟鼎漢後為監察御史累官至集賢直學士鼎襲江陰水軍萬戶

賈文備

賈文備字仲武祁州蒲陰人父輔仕金為祁州刺史武仙憚輔膽略密令所親圖之輔以衆歸太祖詔隸張柔以兵攻蠡州慶都安平束鹿諸縣皆下之柔開帥府於滿城命輔行元帥府事於祁州從定山東遷左副元帥柔將兵在外輔常居守累功改行軍千戶賜金符尋領

順天河南等路軍民萬戶卒文備襲父千戶職張柔命屯
三汉口備宋兵宋以雲梯三十餘來攻文備率兵鏖戰
却之憲宗賜弓矢銀盃歲乙卯復令襲父左副元帥職
兼領順天路中統二年升開元府路女真碩達勒達等
處宣撫使佩金虎符三年遷開元東京懿州等處宣慰
使四年改萬戶領張柔所部軍屯亳州宋兵時抄掠淮
甸文備戰却之至元二年加昭勇大將軍真定路總管
兼府尹六年調衛輝路總管七年授西蜀成都統軍以

疾不赴八年授宿州萬戶尋改河南等路統軍圍襄樊
九年移蔡州兼水陸漕運宋兵時掠糧餉文備敗之併
奪其船詔罷統軍文備入覲賜弓矢金鞍錦衣白金十
一年復授萬戶漢軍都元帥領劉整軍駐亳州宋將夏
貴知毫無備盛引兵來襲文備出奇邀擊大破之帝賜
金鞍金織文段白金丞相巴延伐宋文備領左翼諸軍
以從抵郢州宋築二城夾江布戰艦數千艘于江中陳
兵兩岸軍不得進文備泛舟由淪河徑出大江攻武磯

堡乃從阿珠先渡江大軍繼之遂取鄂漢以功賜白金
加昭毅大將軍守鄂州十二年從平章政事阿爾哈雅
趣湖南至潭州城下文備冒鋒鏑傷右手流矢中左
臂攻戰愈急宋臣李芾死之轉運判官鐘蜚英等以城
降十三年加昭武大將軍守潭州十四年衡永郴等郡
寇發文備悉討平之十五年進鎮國上將軍湖南道宣
慰使徇瓊崖等州及廣東瀕海諸城追宋衛王昺十六
年召還拜淮東宣慰使加金吾上將軍鎮慶元十八年

復授都元帥二十年改江東宣慰使討建寧盜黃華二十二年拜荆湖占城行中書省叅知政事二十三年改湖廣行省叅知政事二十四年致仕後十七年以疾卒延祐四年贈江西等處行中書省左丞追封武威郡公諡莊武

解誠

解誠易州定興人善水戰從伐宋設方略奪敵船千計以功授金符水軍萬戶兼都水監使焦湖之戰獲戰艦

三百艘宋以舟師來援誠據舟厲聲呵之援兵不敢動
急移舟抵岸乘勢追殺之奪其軍餉三百餘斛既又從
攻安豐壽復泗亳諸州俱有功又從下雲南大理國以
功賜金虎符從攻鄂奪敵艦千餘艘殺溺敵軍甚衆世
祖嘉其功嘗降制獎之至元三十年卒贈推忠宣力功
臣龍虎衛上將軍同知樞密院事上護軍追封易國公
謚武定子汝楫襲從討李璫平宋累獲功賞卒贈推忠
效節功臣資德大夫中書右丞上護軍追封易國公謚

忠毅子特爾格襲從征廣西下靜江府改水軍招討使
尋復為萬戶從征交趾有功陞廣東道宣慰使卒贈資
德大夫河南江北等處行中書省左丞上護軍平陽郡
公謚武宣子世英由監察御史遷山南江北道僉事

管如德

管如德黃州黃陂縣人父景模為宋將以蘄州降授淮
西宣撫使如德為江州都統制至元十二年亦以城降
先是如德嘗被俘擄思其父與同輩七人間道南馳為

邏者所獲械送于郡如德伺邏者怠即引械擊死數十人各破械脫走間闖萬里達父所景模喜曰此真吾兒也至是入覲世祖笑曰是孝於父者必忠於我矣一日授以強弓二如德以左手兼握右手悉引滿之帝曰得無傷汝臂乎後毋復然嘗從獵遇大溝馬不可越如德即解衣浮渡帝壯之由是稱為已圖賞賚優渥帝問我何以得天下宋何以亡如德對曰陛下以福德勝之襄樊宋咽喉也咽喉被塞不亡何待帝曰善帝又命習國

書曰習成當為朕言之一日帝語如德曰朕治天下重
惜人命凡有罪者必令面對再四果實也而後罪之非
如宋權姦擅權書片紙數字即殺人也汝但一心奉職
毋懼忌嫉之口授湖北招討使總管本部軍馬佩金虎
符是年六月丞相阿珠南攻宋如德以軍為前鋒至揚
州楊子橋與宋戰晝夜不息如德先登陷陣擒其帥張
都統等宋軍遂潰七月進軍焦山江上復大戰奪宋帥
夏都統牌印衣甲及餉軍海船悉送阿珠所事聞帝命

賞之軍至鎮江如德招安諸郡守將皆望風降附丞相
巴延取臨安復選能招諸郡者衆推如德如德銜命往
諭紹興諸郡皆下初世祖以寶刀賜如德及與敵戰刀
刃盡缺宋平入覲如德以刀上呈曰陛下向所賜刀從
軍以來刀缺如是矣帝嘉其朴十二年遷浙西宣慰使
上時政五條一曰立額薄征二曰息兵懷遠三曰立法
用人四曰省役恤民五曰設官制祿時法制未備仕多
冗員又方用兵日本倭國而軍民之官廩祿無定制故

如德言及之權臣抑不得上二十年丞相安塔哈命馳
驛奏出征事入見世祖問曰江南之民得無有二心乎
如德對曰往歲旱澇相仍民不聊生今累歲豐稔民沐
聖恩多矣敢有貳志使果有貳志臣曷敢飾辭以欺陛
下乎帝善其言且諭之曰安塔哈有未及者卿善輔導
之有當奏聞者卿勿憚勞宜馳捷足之馬來告於朕二
十四年遷江西行省叅知政事破豪猾去姦吏居民大
悅是時贛汀二州盜起如德指揮諸將討平之其脅從

者多所全宥二十六年遷江西行尚書省左丞時鍾明亮以循州叛殺掠州縣千里丘墟帝命如德統四省兵討之諸將欲直擣其巢穴如德曰嘻今田野之氓疲於轉輸介冑之士病於暴露重困斯民而自為功吾不為也於是遣使諭以禍福賊感如德誠信即擁十餘騎詣贛州石城縣降平章政事鄂囉齊怒其拔扈不臣欲以事殺明亮如德聞之曰皇元仁厚未嘗殺降明亮叛入何足惜所重者信不可失耳年四十有四卒于軍贈江

西行省左丞平昌郡公謚武襄子九淳祖積官中順大夫龍興路富州尹

趙實喇

趙實喇者始以父任為千戶佩金符中統三年守東川四年宋夏貴以兵侵虎嘯山寨元帥奇徹遣實喇率兵往禦之貴敗走追至新明縣斬首三十餘級宋劉雄飛以兵犯青居山舊府實喇與戰於都尉壩敗之斬首十餘級奇徹攻釣魚山遣實喇以兵千五百人略地至南

壩擊敗宋軍生獲軍士五十七人老幼三百四十人從
攻大良平宋咎萬壽運糧至渠江之鳶灘實喇邀擊之
斬首五十餘級宋兵大敗實喇亦被三創矢鏃中左肩
不出奇微惜其驍勇取死囚二人刳其肩視骨節淺深
知可出即為鑿其創拔鏃出之實喇神色不動至元三
年為東川路先鋒使四年元帥拜達勒攻開州至萬寶
山遣實喇以兵五百人擊宋軍生獲四十人五年兼管
京兆延安兩路新軍戍東安虎嘯山兩城宋楊立以兵

護糧送大良平實喇察知之遂率所部兵與立戰於三
重山斬首百五十級擒獲四十餘人立敗走棄其糧千
餘石因盡奪其甲仗旗幟而還六年行院遣實喇攻釣
魚山之沙市焚其敵樓從左丞奇爾濟蘇等入朝詔賞
白金五十兩細甲一領九年統軍哈喇攻釣魚山時實
喇為先鋒領兵千人略地至葛樹坪與宋兵遇生獲二
十餘人斬首四十級十年三月復從行院哈達攻釣魚
山之沙市實喇乘夜蟻附而登殺其守兵燒其積聚生

獲二十餘人以歸又擊敗宋將張珏兵於武勝軍行院
新拔禮義山砦命賓喇守之十二年率舟師會攻釣魚
山戰數有功進圍重慶宋將趙安勒兵出戰賓喇迎擊之
夜至二鼓敵衆大潰行院以其功上聞未報而疾作乃
遣往瀘州治疾至之夕瀘州復叛賓喇與疾出戰遂為
其所獲與從者二十人皆死之子世顯船橋副萬戶

周全

周全其先汝寧光州人仕宋為武翼大夫廣南西路馬

步軍副總管至元十二年丞相巴延總兵下江南全率
衆來歸遂以行省檄遥授衡州知州是年秋七月入覲
賜金符授明威將軍遥授泉州知州兼管軍千戶冬十
月從元帥宋都木達下江西諸城邑明年進兵福建宋
制置使黃萬石降冬十月從大軍征廣東十一月至韶
州城下嚴攻具率勇士先登與宋兵合戰斬馘甚衆殺其
安撫使熊飛十二月以遊騎巡廣中過靈星海石門敵
勢甚張全奮戈殺敵乘勝奪其旗鼓火其船及諸軍下

廣州全功居多十四年從攻廣西靜江府宋安撫李夢龍率衆來降其有負固不下者悉戰敗之奪敵艦以千計殺敵溺死者無算兩廣以平第功賜虎符授管軍總管十五年盜據贛州崖石山寨全率兵討平之焚其寨十七年進廣威將軍管軍副萬戶鎮守龍興二十年以疾去官大德九年卒贈懷遠大將軍南安寨兵萬戶府萬戶輕車都尉追封汝南郡侯子祖瑞襲職

孔元

孔元字彥亨真定人驍勇有智略歲丁酉棄家從軍隸丞相史天澤麾下戊戌從取焦湖圍壽春先登拔其西堡己亥從征安豐力戰却敵己酉從圍泗州拔之辛亥從攻五堂山寨俘其衆以歸戊午從攻樊城親王塔齊爾命取樊西堡元率死士挺槍大呼擊殺數百人斬首十九級以獻中統元年扈駕北征二年宣授管軍總把至元十一年從伐宋為前鋒所向克捷十四年進武略將軍管軍千戶明年還軍北征進武義將軍侍衛親軍

千戶賜佩金符又明年國兵討叛王寶勒們等從行院
拜奇貞勒密實追其衆至烏蘇洋而還分軍之半扼其
要害地衆遂潰獲輜重牛馬帝大悅賞賚甚厚加宣武
將軍右衛親軍總管十九年以疾卒子鷹揚襲授昭信
校尉右衛親軍弩軍千戶仍佩金符至大元年以疾卒
子成祖襲延祐二年卒子諾海襲

朱國寶

朱國寶其先徐州人後徙寶坻父存器歷官至修內司

使嘗夜行廬溝橋獲金一囊坐而待其主以付之其人
請中分存器笑而遣之憲宗將攻宋募兵習水戰國寶
以職官子從軍隸水軍萬戶解誠麾下已未世祖以兵
攻鄂國寶攝千戶率銳卒於中流與宋師鏖戰凡十七
戰諸軍畢濟中統二年授千戶佩銀符三年圍李璫於
濟南佩金符鎮戍海東從征襄陽攝四翼鎮撫督造戰
艦築萬山堡至元十一年拔沙洋隳新城皆與有力焉
初師次江上國寶請於丞相已延願當前鋒既而奪船

二十艘以獻巴延壯之宋據上流方舟數百結為堡柵
巴延指示曰復能奪取是乎國寶即奮往破柵既渡江
下鄂漢十二年進兵臨岳州與宋兵戰於岳之桃花灘
獲其將高世傑進昭信校尉管軍總管既降湖右加宣
武將軍統蒙古諸軍鎮常德府知安撫司事時宋諸郡
邑多堅守不下國寶傳檄招諭踰月悉平惟辰沅靖鎮
遠未下宋將李信李發結武岡洞蠻分據阨塞國寶擊
敗之其衆退保飛山新城思播蠻來援國寶復與戰破

之擒張星沈舉等三百餘人進攻新城獲信發等獻俘
江陵行省奏功賜金虎符十四年會諸道兵攻廣西靜
江拔之進秩管軍萬戶鎮守梧州領安撫司事十五年
加懷遠大將軍初宋臨安之破也張世傑挾二王由閩
蹈海衆復滋蔓時南恩新州何華張翼擁兵興復軍勢
甚盛國寶選精銳擊殺華翼擒其黨二人斬首萬餘級
俘五百餘人船七百艘奪其兵器無算降其將十餘軍
士二百民三萬餘戶十六年遷定遠大將軍海北海南

道宣慰使蜚賊連結鬱林廉州諸洞恣行剽掠國寶悉平之磔尸高化以懲反側任龍光等率所部五千戶降移瓊州立官程更弊政訓兵息民具有條制南寧謝有奎負固不服國寶開示信義有奎感悟以其屬來歸於是黎民降者三千戶蠻洞降者三十所十八年破臨高蠻寇五百人招降居亥番亮銅鼓博吐桐油等十九洞遣部將韓旺率兵略大黎密塘橫山誅首惡李寶火其巢生致大鍾小鍾諸部長十有八人加鎮國上將軍海

北海南道宣慰使都元帥供給占城軍餉事集而民不
擾二十三年遷廣南西道宣慰使二十四年入覲帝慰
勞之二十五年進輔國上將軍都元帥叅知政事行尚
書省事以軍事至贛州得疾卒于傳舍年五十九子斌
襲職累官加賜金虎符海北海南宣慰使都元帥贊上
副萬戶佩金虎符鎮福州次鼎次鉉

張立

張立泰安長清人初隸嚴實麾下略江淮有功署為百

戶歲戊午憲宗征蜀徵諸道兵立從行次大獲山宋人阻山為城帶江為池恃以自固立統銳卒攻陷外堡奪戰船百餘艘復從攻釣魚山有功賜金帛中統初從世祖北征還授管軍總把賜銀符進侍衛軍鎮撫換金符改侍衛軍千戶尋遷左衛親軍副都指揮使賜金虎符十四年春率步卒千人轉粟赴和琳道出應昌會酋帥帕克謀不軌以射士三千踵其後欲乘間奪其資糧立覺其有異急命環車為柵以備之賊衆已合矢如雨下

初立之發上都也每車載二板以備不虞至是建板于車矢不能入騎卒稍前即以戈撞之強弩繼發賊不得近相持連日乃解去是歲增置前後衛兵進明威將軍後衛親軍都指揮使賜雙珠虎符加昭勇大將軍以老乞退子珪襲珪卒子伯潛襲

齊秉節

齊秉節字子度濱州蒲臺人父珪從嚴實攻歸德廬州有功授無棣縣尹攝征行千戶後兼總管鎮棗陽中統

三年李璫以益都叛徵諸道兵進討棗陽精銳盡行僅留羸卒千餘珪時攝萬戶府事與宋襄郢對壘敵來覘虛實珪城守周密以東門外壕狹小可越命浚之為備宋將聶都統陳總管果率兵萬餘抵城東門以板渡壕壕廣板不能及珪率衆力戰敵退走城賴以完事聞賜金符真授千戶至元三年告老舉秉節自代秉節魁偉沈毅涉獵書史稍知兵法襲父爵仍鎮襄陽五年從伐宋築新城白河口堡鹿門山略地郢州大洪山黃仙洞

數著戰功七年陞上千戶權萬戶十一年從丞相巴延至郢盪舟由陸入江攻武磯堡擒宋將閻都統十二年國兵敗宋賈似道孫虎臣舟師于丁家洲命秉節屯建康與宋將趙淮戰于西離山追至溧陽自辰及午宋軍乃退八月遷武義將軍十二月從定太平安慶諸郡與宋將張咨議戰于崑山殺之十四年授宣武將軍管軍總管時黃州復叛令秉節往討斬余總轄于陣十七年授明威將軍二十三年移鎮饒州安仁劇賊蔡福一叛秉

節與有司會兵討之擒福一餘黨悉平二十五年陞廣威將軍東陽萬戶府副萬戶二十八年卒年六十二子英襲

張萬嘉努

子孝忠

張萬嘉努父扎呼岱事睿宗於潛邸從破金有功賜虎符授河東南北路船橋隨路兵馬都總管萬戶從西征下興元圍嘉定歿于軍萬嘉努數從都元帥大達哈拉征討有功中統元年從都元帥耜埒入朝授以父官宋兵入成都從行院阿爾圖擊破之至元四年帥師會立眉

簡二州從伊蘇岱爾攻瀘州敗宋軍殺傷過半俘四十
餘人以歸七年率諸軍城張廣平與宋人戰斬首三百
餘級獲都統一人從攻重慶破朝陽寨圍嘉定柵平康
太和懷遠諸寨分兵以守之且日出師水陸接戰功居
多而諸將攻瀘州往往失利乃詣闕請自任以攻取之
效許之遂率舟師百五十艘自桃竹灘至折魚灘分守
江面謹風火嚴號令約日進攻先據神臂門為梯衝登
城殺二百餘人斬關而入遂拔之加昭勇大將軍會圍

重慶將其衆斷馬湖江分兵水陸往來為游徼加昭毅
大將軍以所部轉餉成都及下流諸屯尋遷招討使與
都元帥雅爾哈討亦奚不薛蠻平之進副都元帥詔其
子孝忠為船橋萬戶以萬嘉努將四川湖南兵征哈喇
章時雲南惡昌多興羅羅諸蠻皆叛殺掠使者刼奪人
民州郡莫能制遂以其兵討之勦其衆民為之立祠二
十年從征緬戰死之雲南王命其子保通將其軍從征
入太公域有功襲副都元帥又從征至甘州山丹亦戰

死孝忠少從父軍中好攻戰至元十九年從都元帥伊蘇岱爾討亦奚不薛蠻遇其衆于會靈關追至沙谿敗之進攻龍家寨阿那闊克之遂攻亦奚不薛營大破之又以八百人敗阿永蠻於鹿札河乘勝至打鼓寨連破之諸蠻平以功賜金帛弓矢鞍轡還軍成都二十二年從討烏蒙蠻復擊降大埧都掌蟻子諸蠻加明威將軍二十七年詔從西征至沙瓜諸州還賜虎符僉書四川等處行樞密院事院罷以本軍萬戶鎮成都卒

郭昂

郭昂字彥高彰德林州人習刀槩能挽強稍通經史尤工於詩至元二年上書言事平章廉希憲材之授山東統軍司知事尋改經歷遷襄陽總軍司轉沅州安撫司同知佩金符招降溪洞八十餘柵播州張華聚衆容山昂率兵屠之山猺木猫土獠諸洞盡降十六年以諸洞酋入朝帝賜金綺衣鞍轡進安遠大將軍徇沅州西南界復新化安仁二縣擒劇賊張虎縱之曰汝非吾敵願

降即來不然吾復擒汝不難也明日虎降并其衆三千
餘人悉使歸民籍軍還衆斂白金以獻一無所受行至
江陵衆復從致金而去昂悉上之行省宰臣令藏於庫
以示諸將二十六年江西盜起昂討之進逼南安明揚
上龍巖湖綠村石門鴈湖赤水黑風洞諸蠻立太平寨
而還會大饑以賊酋家資分賑之授萬戶賜金虎符鎮
撫州未幾省檄昂赴廣東監造戰船行至廣東界遇賊
移檄諭以禍福廣東素服其威信及見其檄即俱降授

廣東宣慰使卒年六十一子震杭州路鎮守萬戶惠僉
江西廉訪司事豫知寧都州

綦公直

綦公直益都樂安人世業農至元五年為益都勸農官
九年為沂莒膠密寧海五州都城池所千戶十年賜金
符命造征日本戰船于高麗時宋未下世祖知其勇遣
使召見俾與呼巴哩巴圖等領兵同行荆南等處招討
司事抵峽州青草灘霖雨不進還屯玉泉山率兵三千

攻安進下寨破之殺宋軍百餘人獲牛馬七百還至襄陽樞密院命督造戰艦運舟襄陽既下奉旨領鄧州光化唐州漢軍及郢復熟麥軍九千二百人從諸軍南伐二十年冬至隆興宋軍突出城門逆戰公直敗之追抵城下遂踰壕拔木焚其樓櫓斬首萬餘級生擒七百人隆興降由是南安吉贛皆望風款附平堡柵六百餘所公直又令第三子孟古岱進攻梅關破淮德山寨入廣東至南海皆下之詔授公直武毅將軍管軍上千戶名

入加昭勇大將軍管軍萬戶佩金虎符領侍衛親軍時
巴延巴爾達噶圖古勒叛西夏命公直率軍討平之十
八年五月陞輔國上將軍都元帥宣慰使鎮巴實伯里
初帝詔以長子泰襲萬戶公直自陳父年老乞以泰為
樂安縣尹就養其父制可仍終身勿徙他職至是乃以
蒙古岱襲萬戶佩金虎符從之鎮公直陞辭曰臣父喪
五年願葬以行帝許之至家葬事畢遂計樂安稅課及貧
民逋負悉以賜金代輸之乃行二十三年諸王海都叛

侵巴賁伯里公直從丞相巴延進戰於洪水山敗之追擊寔遠援兵不至第五子瑗力戰而死公直與妻及孟古岱俱陷焉二十四年孟古岱奔還授定遠大將軍中侍衛親軍副都指揮使改湖州礮手軍匠萬戶討衢州山賊有功加昭勇大將軍泰後終於知寧海州

楊賽音布哈

楊賽音布哈初名漢英字熙載賽音布哈賜名也其先太原人唐季南詔臨播州有楊端者以應募起竟復播

州遂使領之五代以來世襲其職五傳至昭無子以族子貴遷嗣又八傳至粲粲生价价生文文生邦憲皆仕宋為播州安撫使至元十三年宋亡世祖諭之邦憲奉版籍內附授龍虎衛上將軍紹慶珍州南平等處沿邊宣慰使播州安撫使卒年四十三贈推忠效順功臣平章政事追封播國公諡惠敏漢英邦憲子也生五歲而父卒二十二年母田氏攜至上都見世祖於大安閣帝呼至御榻前熟視其眸子撫其頂者久之乃諭宰臣曰

楊氏母子孤寡萬里來庭朕甚憫之遂命襲父職錫金
虎符因賜名賽音布哈及陞辭詔中書錫宴賜金幣綵
繒賚其從者有差二十五年再入覲時年十二帝見其
應對明敏稱善者三復因宰臣奏安邊事帝益嘉之是
年改安撫司為宣撫司授宣撫使尋陞侍衛親軍都指
揮使成宗即位賽音布哈兩入見贈謚二代大德五年
宋隆濟及折節等叛詔湖廣行省平章劉二巴圖指揮
使額森呼圖克率兵偕賽音布哈討之六年秋九月師

出播境連與賊遇破之前駐蹕泥賊騎猝至賽音布哈奮擊先進大軍繼之賊遂潰乘勝逐北殺獲不可勝計遂降阿苴下竿籠望塵送款者相繼七年正月進屯暮窩賊衆復合又與戰于墨特川大破之折節懼乞降斬之又擒斬隆濟等西南夷悉平八年賽音布哈復入見進資德大夫至大四年加勲上護軍詔許世襲播南廬崩蠻內侵詔賽音布哈暨恩州宣慰使田茂忠率兵討之以疾卒於軍年四十贈推誠秉義功臣銀青榮祿大

夫平章政事柱國追封播國公謚忠宣子嘉貞嗣

鮮卑仲吉

鮮卑仲吉中山人歲己亥國兵定中原仲吉首率平灤
路軍民詣軍門降太祖命為灤州節度使從顏蘇倫南
征充右副元帥攻取信安闕州諸城以功賜虎符授河
北等路漢軍兵馬都元帥歲壬辰平蔡有功加金吾衛
上將軍興平路都元帥右監軍永安軍節度使兼灤州
管內觀察使提舉常平倉事開國侯尋卒子準克管軍

千戶從扎拉台和爾齊東征高麗中統初賜金符扈駕
征額呼布格以功受上賞三年從征李璫至元十年授
侍衛親軍千戶昭武大將軍大都屯田萬戶佩虎符改
子誠襲授宣武將軍高郵上萬戶府副萬戶佩虎符改
授懷遠大將軍僉武衛親軍都指揮使司事領兵征瓜
哇攻八百媳婦國使廣東克勤于役尋以疾卒子胡土
克圖襲

完顏實珠

完顏實珠祖德珠仕金為管軍千戶父納珠歸太祖從征西域河西又從太宗攻下鳳翔同州有功賜虎符巴圖爾佩銀符為同州管民達嚕噶齊改賜金符兼征行千戶總管巴圖軍憲宗以納珠年老命實珠襲其職己未實珠從世祖征哈喇章還都元帥耨埒攻馬湖江實珠奪浮橋與宋戰有功賞白金七百五十兩軍龍化縣與宋兵戰敗之中統二年授征行萬戶佩金符三年從都元帥特爾格攻嘉定有功改賜金虎符至元四年敗宋

兵于九頂山生獲四十餘人五年攻瀘州之水寨擊五
獲寨渡馬湖江迎擊宋兵敗之從行省伊蘇岱爾攻建
都建都降從攻嘉定復瀘州取重慶寶珠之功居多十四
年遷昭勇大將軍十六年授四川東道宣慰使十七年
改鎮國上將軍四川西道宣慰使總管隨路巴圖萬戶
二十年拜四川行省叅知政事卒弟玲通襲為隨路巴
圖萬戶

元史卷一百六十五

元史卷一百六十五考證

張禧傳十八年加鎮國上將軍都元帥 按十八年原刻誤作十七年考世祖本紀經世大典征日本係十八年且下言八月颶風各本俱指十八年八月而言今據改

賈文備傳中統二年升開元府路女真碩達勒達等處宣撫使 按二年原刻誤作三年後又重出三年今據永樂大典改

管如德傳二十年丞相安塔哈命馳驛奏出征事 按
二十年原刻脫二字上文已叙至十二年事不得復
追述二年考安塔哈傳以二十年遷征東行省丞相
其奏出征事當即是時今據改

朱國寶傳贊上副萬戶佩金虎符鎮福州 按贊原刻
斌上文已言斌襲職累官此又重出其言佩金虎符
亦與上複永樂大典作贊與斌別為一人似為無誤
今據改

張萬家努傳授河東南北路船橋隨路兵馬都總管萬
戶 按河東南路北原刻作河南北路誤置東字於
戶字下今據永樂大典改

楊賽音布哈傳价生文 按原刻脫价字今據永樂大
典改

楊賽音布哈傳二十二年母田氏攜至上都見世祖於
大安閣 按上都原刻作上京大安閣原刻作大安
殿考元以開平為上都不名上京世祖建大安閣於

上都丕名殿今據世祖本紀改